

(1)

小明放學返到屋企，見到枱上面有張一百蚊，旁邊有張紙寫住「畀小明」。

小明心諗：「媽媽平時一蚊零用錢都有畀我，今日畀一百蚊我。發生咩事咁好彩呢？」

當小明拎起張一百蚊，發現下面砸住張字條，上面寫住：

「小明，今日放咗學唔好周圍去，喺屋企等我。今日係你婆婆生日，我收工帶埋你過婆婆度食飯。

記得幫我喺雪櫃拎個蛋糕，仲有幫我做晒屋企嘅家務。我收工趕唔切做。」

然後小明睇到最下面有一行字寫住：

「P.S 呢一百蚊唔係畀你嘅，只係用嚟引你注意。你唔好拎咗去，陣間記得畀返我。」

(2)

小明係一個超級大肥佬，身邊嘅人都叫佢減肥，但係佢就係唔聽。佢老友阿成有次同佢飲酒。

阿成話：「唔好話我話你，你睇你肥到嘅，邊有女人會睇你上眼啊。跑兩步又話𦵏，好心你做下運動減下肥啦。」

「你成四十歲人，一日剩係掛住食，夜晚就打機睇波，行幾步路都話遠要搭車。你𦵏樣點得啊。」

小明飲咗啖酒，喺阿成耳邊講「我屋企隻貓要生BB喇」，然後就走咗出門口。

阿成唔知咩事，埋咗張單就出去搵小明。

阿成話：「喂，你做咩走咗去啊，你屋企隻貓要生BB關你減肥咩事啊？」

小明答：「𦵏我減唔減肥，又關你咩事？」

(3)

真人真事

有一個好出名嘅機場，每日有好多班飛機升降。

有一日，一架就嚟起飛嘅A320飛機因為壞咗，要維修，所以起飛時間要推遲。

乘客都拎返晒啲行李落機。但係咁啱個閘口有其他機要用，
所以機組工作人員通知乘客先到15號閘等，直到維修完就會再叫佢哋上機。
但係當大家去到15號閘嘅時候，機場又廣播15號閘閘門壞咗，
所有由15號閘登機嘅班機全部改晒去206閘口。
因為206閘口係喺二號客運大樓，所以大家要搭列車過去。
飛機終於整好，所有人亦都重新上機。噉空姐就做個機上廣播：
「咁多位先生女士唔好意思，因為機件故障嘅關係，我哋遲咗一個鐘，而且因為閘口故障嘅關係，
令大家跑咗唔少地方，提提大家呢班機係去英國倫敦，如果你上錯飛機，請你立即通知空中服務員。」
我個位近機門，我見到機長急急腳喺駕駛房走出嚟，一路講「頂，原來唔係去紐約，搞錯咗添。」

(4)

醫院，好多醫生都好緊張，應該係有一個大人物受咗傷，嚟緊搶救。
成間醫院上上下下都好關心呢位傷者，原來係司令。
醫生開完會，決定由小明醫生幫司令做手術。因為小明醫生出名冷靜手勢好。
手術開始，手術室外保安重重，似乎係怕敵人對司令不利。
小明話：「刀！」
助手一刀插落小明度。
助手話：「對唔住，我係間碟。我唔可以畀你救返你哋嘅司令，佢一定要死。」
小明就答：「我頂！噉你插佢丫！插我做咩啊！」

The CC BY 4.0 license REQUIRES that any reused or repurposed content must have the correct ATTRIBUTION. Please use the text below in your citations, printouts and copyright pages.

Attribution Text

“Mini Stories” (Cantonese), written by 939, published by HamBaangLaang (© HamBaangLaang, 2021) under a [CC BY 4.0](#) license on hambaanglaang.hk

[Find out more here: [HamBaangLaang Attribution terms and CC 4.0](#)]
